

დამტკიცებულია: ს.ს.ი.პ. „საქართველოს ადვოკატთა ასოციაციის“  
აღმასრულებელი საბჭოს 12.01.2018 წლის გადაწყვეტილებით

## საქართველოს ადვოკატთა ასოციაციის

არასამთავრობო ორგანიზაციებთან ურთიერთობის კომიტეტის

### დ ე ბ უ ლ ე ბ ა

#### მუხლი 1. ზოგადი დებულებები

- 1.1. საქართველოს ადვოკატთა ასოციაციის (შემდგომში „ასოციაცია“) არასამთავრობო ორგანიზაციებთან ურთიერთობის კომიტეტი (შემდგომში „კომიტეტი“) წარმოადგენს ასოციაციის მუდმივმოქმედ ორგანოს.
- 1.2. კომიტეტი შექმნილია საქართველოს ადვოკატთა ასოციაციის წესდების 15.1 მუხლის „წ“ პუნქტისა და 16<sup>1</sup> მუხლის შესაბამისად.
- 1.3. კომიტეტის საქმიანობის წესს (დებულებას) ამტკიცებს საქართველოს ადვოკატთა ასოციაციის აღმასრულებელი საბჭო.
- 1.4. კომიტეტი შექმნილია უვადოდ, უფლებამოსილებას იწყებს წინამდებარე დებულების დამტკიცებისთანავე.

#### მუხლი 2. კომიტეტის საქმიანობის მიზანი

კომიტეტის მიზანია ადვოკატთა პროფესიული გამოცდილების, შესაძლებლობებისა და ინსტიტუციური დიალოგის უზრუნველყოფა არასამეწარმეო (არაკომერციულ) იურიდიულ პირებთან საქართველოში და მის ფარგლებს გარეთ, სამოქალაქო უფლებებისა და ინიციატივების ერთობლივი გაძლიერება, სამოქალაქო ორგანიზაციების საქმიანობის მხარდაჭერა, ადამიანის უფლებების დაცვა, დემოკრატიისა და კარგი მმართველობის განმტკიცება.

#### მუხლი 3. კომიტეტის ამოცანები და საქმიანობა

##### 3.1. კომიტეტის ამოცანებია:

- 3.1.1. ადვოკატის პროფესიის, საქმიანობის, მიღწევებისა და ინსტიტუციური რეფორმების თაობაზე სამოქალაქო საზოგადოების ინფორმირება და პროფესიულ საქმიანობაში მათი თანამონაწილეობის გაზრდა;
- 3.1.2. ქვეყანაში ადამიანის უფლებების დაცვის, კანონის უზენაესობის გამტკიცების, გამჭვირვალე და საჯარო ინსტიტუციების არსებობის, თანასწორუფლებიანი

მართლმსაჯულების განხორციელებისა და დამოუკიდებელი პროფესიული საქმიანობის პრინციპების მიმართ, ადვოკატთა კორპუსისა და არასამთავრობო ორგანიზაციის წარმომადგენელთა თანამშრომლობის გაღრმავება და მყარი კოორდინაციის შექმნა;

3.1.3. საზოგადოებაში არასამთავრობო ორგანიზაციების საქმიანობის მიმართ პროფესიული ნდობის ამაღლება, მხარდაჭერა და მათი დამოუკიდებლობის დაცვა;

3.1.4. სამოქალაქო ინტერესებზე დაფუძნებული პროფესიული ინიციატივების მომზადება, ადვოკატირება და საზოგადოებრივ სიკეთეებზე მიმართული გარემოს შექმნა.

## **3.2. თავისი ამოცანების განსახორციელებლად კომიტეტი:**

3.2.1 ასოციაციის თავმჯდომარესა და აპარატთან კოორდინაციით, თანამშრომლობს არასამთავრობო ორგანიზაციებთან, ქმნის პროფესიულ ბაზას და უზრუნველყოფს მათ მოწვევას და ჩართულობას ინიცირებულ საკითხებზე;

3.2.2. კომიტეტი შეისწავლის არასამთავრობო ორგანიზაციის წარმომადგენელთა მომართვებს პროფესიული საქმიანობის განხორციელების ხელშემშლის საკითხებზე, პროფესიული საქმიანობისთვის მნიშვნელოვანი წინადადებების განხილვის ან/და ადამიანის უფლებების საკითხზე და ასოციაციის თავმჯდომარესა და აპარატთან კოორდინაციით ახდენს შესაბამის რეაგირებას მისი კომპეტენციისა და უფლებამოსილების ფარგლებში;

3.2.3. კომიტეტი ამზადებს შესაბამის დასკვნებს, კვლევებს, ანგარიშებს, პროექტებს, წინადადებებს, რეკომენდაციებს, როგორც პროფესიულ საქმიანობასთან დაკავშირებულ საკითხებზე, აგრეთვე არასამთავრობო ორგანიზაციების ინსტიტუციურ განვითარებასა და სამოქალაქო სექტორის დაცვის საკითხებზე, რომელსაც წარუდგენს ასოციაციის თავმჯდომარესა და აპარატს;

3.2.4. ასოციაციის თავმჯდომარესა და აპარატთან კოორდინაციით, არასამთავრობო ორგანიზაციებთან ერთად აწყოფს ფორუმებს, სამუშაო შეხვედრებს და კონფერენციებს; თანამშრომლობს ეროვნული, რეგიონალური და საერთაშორისო გამოცდილების მქონე არასამთავრობო ორგანიზაციებთან და უზრუნველყოფს მათი გამოცდილების გაზიარებას და საუკეთესო პრაქტიკის დანერგვას;

3.2.5. ამზადებს საკანონმდებლო წინადადებებს, როგორც არასამთავრობო ორგანიზაციების მონაწილეობით, ასევე საქართველოს ადვოკატთა ასოციაციის სახელით წარსადგენად, რომელსაც წარუდგენს ასოციაციის თავმჯდომარესა და აპარატს.

3.2.6. საქართველოს ადვოკატთა ასოციაციის აღმასრულებელი საბჭოსთვის შეიმუშავებს საჯარო განცხადებების პროექტებს კომიტეტის საქმიანობის სფეროსთან დაკავშირებულ საკითხებზე;

3.2.7. საერთო მიზნებისა და ამოცანების უზრუნველყოფის მიზნით, ასოციაციის თავმჯდომარესა და აპარატთან კოორდინაციით თანამშრომლობს აღმასრულებელ, საკანონმდებლო და სასამართლო ხელისუფლების ორგანოებთან, საერთაშორისო ორგანიზაციებთან, პროფესიულ ჯგუფებთან და მედიასთან;

3.2.8. ასრულებს ნებისმიერ სხვა საქმიანობას, რომელიც დაკავშირებულია მისი მიზნებისა და ამოცანების უზრუნველყოფასთან და არ ეწინააღმდეგება მოქმედ კანონმდებლობას,

საქართველოს ადვოკატთა ასოციაციის წესდებას და ამ დებულებას.

#### **მუხლი 4. კომიტეტის შემადგენლობა**

- 4.1. კომიტეტი შედგება არანაკლებ 7 და არაუმეტეს 15 ადვოკატი წევრისაგან.
- 4.2. კომიტეტს ჰყავს თავმჯდომარე და თანათავმჯდომარე, რომელსაც ნიშნავს და ათავისუფლებს აღმასრულებელი საბჭო.
- 4.3. კომიტეტის თავმჯდომარე და თანათავმჯდომარე აირჩევა კომიტეტის უფლებამოსილების ვადით.
- 4.4. კომიტეტის დანარჩენ წევრებს ამტკიცებს საქართველოს ადვოკატთა ასოციაციის აღმასრულებელი საბჭო კომიტეტის თავმჯდომარის წარდინებით.
- 4.5. კომიტეტის წევრები აირჩევიან 1 წლის ვადით. შესაძლებელია კომისიის წევრის ხელახალი არჩევა.
- 4.6. კომიტეტის წევრი შეიძლება ვადამდე იქნას გაწვეული კომიტეტის შემადგენლობიდან აღმასრულებელი საბჭოს გადაწყვეტილებით, კომიტეტის თავმჯდომარის მიმართვის საფუძველზე.
- 4.7 კომიტეტის თავმჯდომარეს უფლება აქვს კომისიაში მოიწვიოს სხვადასხვა დარგის ექსპერტები და იურიდიული პროფესიის წარმომადგენლები, როგორც სასამართლო სისტემიდან, ასევე სხვა სახელმწიფო ინსტიტუტებიდან.

#### **მუხლი 5. კომიტეტის სხდომა**

- 5.1. კომიტეტი თავის უფლებამოსილების განხორციელებისას ატარებს სხდომებს, რომლებიც მოიწვევა არანაკლებ თვეში ერთხელ. სხდომის ჩატარების დრო და ადგილი გაისაზღვრება კომიტეტის თავმჯდომარის მიერ.
- 5.2. კომიტეტის სხდომა ასევე შეიძლება მოწვეულ იქნას ასოციაციის თავმჯდომარის ინიციატივით.
- 5.3. კომიტეტის სხდომის მოწვევის ორგანიზაციულ საკითხებს უზრუნველყოფს კომისიის თავმჯდომარე ან თანათავმჯდომარე.
- 5.4. კომიტეტის მდივანი სხდომის ჩატარებამდე 3 დღით ადრე კომიტეტის წევრებს ელექტრონული ფოსტით უგზავნის ან ტელეფონით ატყობინებს სხდომის მოწვევის და დღის წესრიგის შესახებ.
- 5.5. კომიტეტის სხდომა უფლებამოსილია, თუ მას ესწრება კომიტეტის წევრთა მესამედზე მეტი. კომიტეტის თითოეული წევრი უფლებამოსილია დააყენოს წინადადება სხდომის დღის წესრიგში ცვლილებებისა და დამატებების შეტანის შესახებ.
- 5.6. კომიტეტი გადაწყვეტილებებს იღებს დამსწრე წევრთა ხმების უბრალო უმრავლესობით, თუ ამ დებულებით სხვა უმრავლესობა არ იქნება დადგენილი. ხმების თანაბრად გაყოფის შემთხვევაში, გადაწყვეტია კომისიის თავმჯდომარის ხმა.
- 5.7. კომიტეტი გადაწყვეტილებებს იღებს ღია კენჭისყრით. გადაწყვეტილება შესაძლებელია მიღებულ იქნას ელექტრონული ფოსტით დადასტურებითაც, თუკი კომიტეტის წევრების სიითი შემადგენლობის უმრავლესობა ელექტრონული ფორმით

გამოხატავს თანხმობას და ეს აისახება კომისიის სხდომის ოქმში.

5.8. კომიტეტის სხდომაზე დგება ოქმი, რომლსაც ადგენს მდივანი. ოქმს ხელს აწერს კომისიის თავმჯდომარე ან თანათავმჯდომარე და მდივანი, რაც ადასტურებს საოქმო ჩანაწერის სიზუსტეს.

## **მუხლი 6. კომიტეტის თავმჯდომარე/თანათავმჯდომარე**

6.1. კომიტეტის თავმჯდომარე კოორდინაციას უწევს კომისიის მუშაობას და უძღვება კომისიის სხდომებს.

6.2. ადვოკატთა ასოციაციის თავმჯდომარის წინასწარი თანხმობის საფუძველზე, კომიტეტის თავმჯდომარეს აქვს უფლება გააკეთოს საჯარო განცხადებები კომიტეტის საქმიანობასა და კომიტეტის მიერ მიღებული გადაწყვეტილებებთან დაკავშირებულ საკითხებზე.

6.3. კომიტეტის თავმჯდომარის მიერ თავისი უფლებამოსილების განხორციელების შეუძლებლობის შემთხვევაში, ადვოკატთა ასოციაციის თავმჯდომარის ან/და თავად კომიტეტის თავმჯდომარის თხოვნის საფუძველზე, კომიტეტის მუშაობას კოორდინირებას უწევს თანათავმჯდომარე.

## **მუხლი 7. კომიტეტის მდივანი**

7.1 კომიტეტის სამდივნოს ფუნქციებს ასრულებს საქართველოს ადვოკატთა ასოციაციის აპარატი.

7.2. მდივანი, ორგანიზებას უწევს კომიტეტის შეხვედრისა და კომიტეტის სხდომის ოქმის შედგენას და მის ხელმისაწვდომობას დაინტერესებული პირებისათვის.

## **მუხლი 8. კომიტეტის საქმიანობის ფინანსური უზრუნველყოფა**

8.1. კომიტეტის წევრები თავის საქმიანობას ახორციელებენ საზოგადოებრივ საწყისებზე.

8.2. კომიტეტის მიერ ორგანიზებული ღონისძიებები და მოწვეული ექსპერტები შეიძლება დაფინანსდეს ასოციაციის ბიუჯეტიდან ან/და კომიტეტის მიერ, ასოციაციის დამფუძნებარესა და აპარატთან კოორდინაციით, მოძიებული გრანტის და შემოწირულობის სახსრებიდან.

8.3. კომიტეტისათვის გამოსაყოფი ბიუჯეტის ოდენობას ამტკიცებს აღმასრულებელი საბჭო.

8.4. გამოყოფილი სახსრების ხარჯვის მიმართულებებს განსაზღვრავს თავად კომიტეტი.

## **მუხლი 9. დებულების შეცვლა**

9.1. წინამდებარე დებულების ცვლილებებსა და დამატებებს, აგრეთვე დებულების ახალ რედაქციას ამტკიცებს საქართველოს ადვოკატთა ასოციაციის აღმასრულებელი საბჭო.

9.2. დებულების ცვლილებებისა და დამატებების ან დებულების ახალი რედაქციის

პროექტს ასოციაციის აღმასრულებელ საბჭოს დასამტკიცებლად წარუდგენს კომიტეტის თავმჯდომარე.

#### **მუხლი 10. დებულების მოქმედების ვადა**

წინამდებარე დებულება ძალაშია ადვოკატთა ასოციაციის აღმასრულებელი საბჭოს მიერ მისი დამტკიცების დღიდან და მოქმედებს კომიტეტის საქმიანობის ვადით.